

每週經課朗誦經文(巴克禮漢羅/教羅)2013/01/01

共同經課 - 1 傳道書三章一節~十三節

1 天下萬般 lóng 有伊 ê 期，萬項事 lóng 有伊 ê 時。2 有出世 ê 時，有死 ê 時；有栽種 ê 時，有拔出所栽種 ê 時；3 有 thài 死 ê 時，有醫好 ê 時；4 有拆毀 ê 時，有起造 ê 時；有啼哭 ê 時，有好笑 ê 時；5 有哀慘 ê 時，有跳舞 ê 時；有 hiat 石頭 ê 時，有拾石頭 ê 時；有 thang 抱 ê 時，有 m-thang 抱 ê 時；6 有 chhē-tiòh ê 時，有失落 ê 時；有保守 ê 時，有放 sak ê 時；有拆裂 ê 時，有補縫(thīⁿ)ê 時；7 有靜靜 ê 時，有講話 ê 時；8 有疼惜 ê 時，有怨恨 ê 時；有交戰 ê 時，有和好 ê 時。9 做工 ê 人 tī 伊所勞碌 ê 有甚麼利益 ah？10 我有看見上帝所 hō 世間人 ê 勞碌，hō in tī hit 中間來練習。11 上帝造萬物，各照伊 ê 時成做美妙，koh 將永遠 ê 觀念 hē tī 人 ê 心；總是上帝對頭到尾所做成 ê，人 boē 能測度伊。12 我知從中無一項 khah 好 tī 一生快樂，koh 行好。13 Koh 人人也食也 lim tī 伊一切所勞碌 ê 來享福，這也是上帝 ê 恩賜。

共同經課 - 2 詩篇八篇

1 大衛 ê 詩，交 hō 樂官，用 Ka-ték ê 樂器；1) 耶和華阮 ê 主 ah，你 ê 名 tī 全地到 chiah 高大！你將你 ê 榮光排設 tī 天裡。2 你因為你 ê 對敵 ê 緣故，tùi 嬰 á kap 食奶 ê 嘴，建立能力；Beh hō 對敵 kap 報冤 ê 靜靜。3 我看你 ê 天，你 ê 手所造 ê，Kap 你所排列 ê 月 kap 星；4 世間人是甚麼，你 siàu 念伊？人 ê kiáⁿ 是甚麼，你眷顧伊？5 你 hō 伊比天使螯 á khah 輸，Koh 賞賜伊榮光尊貴做冕旒。6 你設立伊管理你 ê 手所造 ê，Hē 萬物 tī 伊 ê 腳下；7 就是一切 ê 羊 kap 牛，山野 ê 走獸；8 天中 ê 鳥，海內 ê 魚，Kap 見若經過海裡 ê 路 ê，lóng hē tī 伊 ê 腳下。9 耶和華，阮 ê 主 ah，你 ê 名 tī 全地到 hiah 高大！

共同經課 - 3 啟示錄二十一章一節~六 a 節

1 我 koh 看見有身 ê 天，新 ê 地；因為前 ê 天前 ê 地已經過去；海也無 koh 有。2 Koh 看見聖城，就是新 ê 耶路撒冷，出 tī 天，tùi 上帝降落，已經備辦便，親像新娘裝飾來 thèng 候伊 ê 丈夫。3 Koh 聽見大聲 tùi 座位出，講，上帝 ê 會幕 tī 人 ê 中間，上帝 beh kap in saⁿ-kap khiā 起；in beh 做伊 ê 百姓，上帝本身 beh kap in tī-teh，來做 in ê 上帝。4 Koh beh kā in ê 目調拭去 lóng 總 ê 目屎；無 beh koh 有死失；也無 beh koh 有哀傷，喉叫，痛疼；前 ê tai-chì 已經過去。5 坐 tī 座位 ê 講，我換新萬物。Koh 講，你 tiòh 寫伊，因為 chiah-ê 話是 thang 信，是真實。6 Koh kā 我講，已經成 lah；我就是 A-lī-hoat kap O-bí-ka，是起頭 ê Kap 路尾 ê。

共同經課 - 4 馬太福音二十五章三十一節~四十六節

31 當人子 tī 伊 ê 榮光，kap lóng 總 ê 天使來 ê 時，伊 beh 坐伊榮光 ê 座位，32 聚集萬邦 tī 伊 ê 面前；伊就 beh 分別 in，親像牧者分別綿羊離開山羊。33 將綿羊 hē tī 伊 ê chiáⁿ-pêng，山羊 hē tī 伊 ê tò-pêng。34 Hit 時王 beh kā chiáⁿ-pêng ê 講，Lín tùi 我 ê 父得 tiòh 恩典 ê，進前來承接國，就是 tùi 創造世間以來 kā lín 備辦 ê。35 因為我 iau，Lín bat hō 我食；我嘴乾，lín hō 我 lim；我出外，lín hō 我 toà；我 thng-pak-theh，lín hō 我穿；36 我破病，lín 看顧我；我 tī 監裡，lín 來 chhē 我。37 Hit 時義人 beh 應伊講，主 ah，阮甚麼時看見你 iau，來 hō 你食？嘴乾，來 hō 你 lim？38 甚麼時看見你出外，來 hō 你 toà？thng-pak-theh，來 hō 你穿？39 甚麼時看見你破病，á 是 tī 監裡，來 chhē 你？40 王 beh 應伊講，我實在 kā lín 講，Lín 既然行伊 tī 我 ê 兄弟至微細 ê ê 一個，就是行伊 tī 我。41 Koh beh kā tò-pêng ê 講，Lín 受 chiù-chó^e ê，tiòh 離開我，入永遠 ê 火，就是為 tiòh 魔鬼 kap 伊 chiah-ê 使者所備辦 ê。42 因為我 iau，lín m̄-bat hō 我食；我嘴乾，lín m̄-bat hō 我 lim；我出外，lín m̄-bat hō 我 toà；43 我 thng-pak-theh，lín m̄-bat hō 我穿；我破病 kap tī 監裡，lín m̄-bat 看顧我。44 In 亦 beh 應講，主 ah，阮甚麼時看見你 iau，á 是嘴乾，á 是出外，á 是 thng-pak-theh，á 是破病，á 是 tī 監裡，來無服事你 ah？45 伊就 beh 應伊講，我實在 kā lín 講，Lín 既然無行伊 tī chiah-ê 至微細 ê ê 一個，就是無行伊 tī 我。46 Chiah-ê 人 beh 去入永遠 ê 刑罰；若是義 ê 人入永遠活。